

Ed.

1399. Breytingartillögur

[423. mál]

við frv. til l. um viðskiptabanka.

Frá Eiði Guðnasyni.

1. Við 19. gr. bætist: að fengnu samþykki ráðherra.
2. Við 21. gr.
 - a. 4. mgr. orðist svo:

Bankaráð mótar stefnu bankans í vaxtamálum og setur að fenginni umsögn bankastjórnar og bankaeftirlits almennar reglur um lánveitingar bankans.
 - b. Við greinina bætist ný mgr. sem orðist svo:

Þrátt fyrir ákvæði c-liðar 1. mgr. skal ráðherra heimilt að fresta stofnsetningu allra nýrra útibúa um eins árs skeið ef hann telur nauðsyn á því.
3. Á eftir 25. gr. komi ný gr. er orðist svo:

Í hverjum banka skal vera starfandi starfsmannaráð skipað fjórum fulltrúum starfsfólks, tveimur kjörnum af bankaráði og einum fulltrúa bankastjórnar, og skal kjör fara fram árlega í janúarmánuði. Starfsmannaráð kýs sér formann og ritara. Starfsmannaráð skal fjalla um þau málefni er varða starfsaðstöðu, nýjungar eða breytingar í rekstri og vinnufyrirkomulagi og önnur þau mál er varða starfsfólk sérstaklega. Sérhver sá, er sæti á í starfsmannaráðinu, getur tekið upp slík mál á fundi.

Bankaráð og bankastjórn skulu vísa málum af þessu tagi til starfsmannaráðsins til umfjöllunar. Starfsmannaráðið gerir tillögur og skilar ályktunum til bankaráðs og bankastjórnar.
4. Á eftir 27. gr. komi ný grein svohljóðandi:

Heildarskuldbindingar eins viðskiptaaðila við viðskiptabanka mega ekki nema meira en 35% af bókfærðu eigin fé bankans. Sama gildir um heildarskuldbindingar fleiri en eins viðskiptaaðila sem eru svo fjárhagslega tengdir að með tilliti til útlánaáhattu verði að líta á skuldbindingar gagnvart viðskiptabanka í einu lagi.

Til heildarskuldbindinga skal undantekningarlaust telja allar skuldbindingar viðskiptaaðila við bankann, þ. m. t. ábyrgðir sem bankinn hefur gengið í fyrir viðskiptaaðila. Sé skuldarheimild önnur en bókfærð skuldbinding skal á hverjum tíma telja þá upphæð sem hærri er.

Með einróma samþykki bankastjórnar og samþykki meiri hluta bankaráðs í hverju einstöku tilviki mega heildarskuldbindingar viðskiptaaðila skv. ákvæði 1.—2. mgr. nema hæst 50% af eigin fé. Slík ákvörðun skal tilkynnt bankaeftirlitinu þegar í stað.

Frá heildarskuldbindingum skv. ákvæðum þessarar greinar skal draga skuldbindingar sem eru álitnar sérstaklega tryggar samkvæmt nánari reglum sem ráðherra setur að fengnum tillögum bankaeftirlitsins.

5. Við 28. gr. 2. mgr. orðist þannig:

Viðskiptabanka er óheimilt að eiga hlut í félögum sem reka aðra starfsemi en um getur í 1. mgr.

6. Við 37. gr. Á eftir fyrri málsg. komi fjórar nýjar málsg. er orðist svo:

Ársreikningi skal fylgja sundurliðað yfirlit um launagreiðslur, bifreiðakostnað, ferða- og risnukostnað bankans.

Sundurliðun einstakra þátta skal vera þannig:

I. Launagreiðslur:

- a. Heildarlaunagreiðslur.
 - b. Föst yfirvinna.
 - c. Önnur yfirvinna.
 - d. Hlutfall yfirvinnu í heildarlaunagreiðslum.
- Upplýsingar skulu fylgja um starfsmannafjölda í a-, b- og c-lið.

II. Bifreiðakostnaður:

- a. Fjöldi ríkisbifreiða og rekstrarkostnaður þeirra.
- b. Notkun bílaleigubifreiða.
- c. Notkun leigubifreiða.
- d. Greiðslur fyrir afnot af bifreiðum starfsmanna.

III. Risnukostnaður:

- a. Föst risna greidd einstökum starfsmönnum.
- b. Risna greidd samkvæmt reikningi.

IV. Ferðakostnaður:

- a. Ferðakostnaður innanlands, þ. m. t. dagpeningar.
- b. Ferðakostnaður utanlands, þ. m. t. dagpeningar.

Einnig skal í ársreikningi koma fram svofelld sundurliðun á fjármunamyndun:

Efnislegir fjármunir:

- a. Húseignir, lóðir og lundur.
- b. Vélar, áhöld, húsgögn o. fl.
- c. Bifreiðar.
- d. Aðrar eignir.

Sundurliða skal framangreinda flokka þannig:

1. Keypt og byggt á árinu.
2. Selt á árinu.
3. Afskrifað og fært á rekstrarreikning.
4. Endurmat á árinu fært á endurmatsreikning.

7. Við 40. gr. 2. mgr. orðist þannig:

Á aðalfundi hlutafélagsbanka skulu kjörnir hlutbundinni kosningu a. m. k. tveir skoðunarmenn til eins árs í senn. Jafnframt skal ráðherra skipa einn skoðunarmann til sama tíma og sé hann löggiltur endurskoðandi.

8. **Ákvæði til bráðabirgða I** orðist þannig:

Sameina skal Útvegsbanka Íslands og Búnaðarbanka Íslands í einn banka fyrir gildistöku laga þessara og tekur hinn sameinaði banki við öllum eignum, skuldbindingum, réttindum og skyldum Búnaðarbanka Íslands og Útvegsbanka Íslands. Ráðherra skal með reglugerð ákveða nánar um framkvæmd sameiningarinnar.

Við gildistöku laga þessara starfa tveir ríkisviðskiptabankar, Landsbanki Íslands og Útvegs- og Búnaðarbanki Íslands. Enn fremur starfa fjórir hlutafélagsbankar, Iðnaðarbanki Íslands hf., Verslunarbanki Íslands hf., Samvinnubanki Íslands hf. og Alþýðubankinn hf.